

四庫全書

史部

欽定四庫全書

遼史卷七

元中書右丞相總裁托克托等修

本紀第七

穆宗二

十四年春正月戊寅朔奉安神燹戊戌漢以宋將來襲
馳告二月壬子詔西南面招討使塔拉進兵援漢癸亥
如潢河戊辰支解鹿人摩多哈喇等七人于野封土識

其地已巳如老林東灤壬申漢以敗宋兵石州來告夏
四月丁巳漢以擊退宋軍遣使來謝是月黃龍府甘露
降五月射舐鰓鹿于白鷹山至于浹旬六月丙午朔獵
于玉山竟月忘返秋七月壬辰以酒脯祀黑山八月乙
巳如磴子嶺呼鹿射之獲鹿四賜虞人紐歡等物有差
丁未還宮戊申以生日值天赦不受賀曲赦京師囚乙
卯錄囚九月黃室韋叛冬十月丙午近侍烏爾古綽進
石錯賜白金二百五十兩丙辰以掌鹿舒蘇代斡里為扎

薩克轄賜金帶金盞銀二百兩所隸死罪以下專之十一月壬午日南至宴飲達旦自是晝寢夜飲殺近侍轄魯於禁中十二月丙午以黑兔祭神烏爾古叛掠民財詳袞僧隱與戰敗績僧隱及伊實等死之

十五年春正月己卯以樞密使伊勒希為行軍都統虎軍詳袞齊蘇為行軍都監益以圖魯卜部軍三百合兵討之烏爾古額爾奇木子博勒岱獨不叛詔褒之是月老人星見二月壬寅朔日有食之上東幸甲寅以獲鴨

除鷹坊刺面腰斬之刑復其徭役是月烏爾古殺其長
蘇爾台以降復叛三月癸酉近侍棟爾進七筋不時手
刃刺之丁丑大黃室韋酋長伊聶濟叛癸未五坊四十
戶叛入烏爾古癸巳虞人色勒迪偵鵠失期加炮烙鐵
梳之刑而死夏四月乙巳小黃室韋叛伊勒希齊蘇等
擊之為室韋所敗遣使詰之乙卯以托里代伊勒希為
都統以農衮為監軍率輕騎進討仍令塔瑪錫濟爾持
詔招諭五月壬申錫濟爾奏諭之不從伊勒希以達林

蘇二羣收兵追至柴河與戰不利甲申庫果濟奏室韋
長伊鼎濟亡入於德呼六月辛亥伊楞古獻良馬賜銀
二千兩以近侍呼喇先以聞賜銀千兩是月德呼來降
秋七月甲戌伊勒希奏烏爾古至河德灤遣額爾奇木
華喇伊勒希巴察實擊之丁丑烏爾古掠上京北榆林
峪遣林牙蕭斡討之庚辰伊勒希等與烏爾古戰不利
十月丁未察實與烏爾古戰敗之十二月甲辰以近侍
喜格私歸殺其妻丁未殺近侍蘇魯克駐蹕黑山平淀

十六年春正月丁卯朔被酒不受賀甲申微行市中賜酒家銀絹乙酉殺近侍白海及家僕衫福雅爾噶樞密使門吏隆科塔瑪舒嚕三月己巳東幸庚午獲鴨甲申獲鵝皆飲達旦五月甲申以歲旱泛舟于池禱雨不雨捨舟立水中而禱俄頃乃雨六月丙申以白海死非其罪賜其家銀絹秋七月壬午諭有司凡行幸之所必高立標識令民勿犯違以死論八月丁酉漢遣使貢金器鎧甲閏月乙丑觀野鹿入馴鹿羣立馬飲至晡九月庚

子重九宴飲夜以繼日至壬子乃罷己未殺狼人紐幹
哩十月庚辰漢主有母喪遣使賻弔十二月甲子幸酒
人伯勒格家復幸殿前都點檢耶律伊勒哈第宴飲連
日賜金盃細錦及孕馬百匹左右授官者甚衆戊辰漢
遣使來貢是冬駐蹕黑山平淀

十七年春正月庚寅朔林牙蕭幹郎君耶律賢適討烏
爾古還帝執其手賜酒授賢適右皮室詳袞伊勒希齊
蘇轄哩賜醕酒以辱之乙卯伊勒希巴古雲獻烏爾古

俘二月甲子高勲奏宋將城益津闕請以偏師擾之上
從之夏四月戊辰殺鷹人達魯丙子射柳祈雨復以水
沃羣臣五月辛卯殺鹿人扎喀壬辰北府宰相蕭哈里
薨輟朝罷重五宴六月己未支解雉人壽格寧古殺鹿
人四十四人是夏駐蹕裏潭秋八月辛酉生日以政事
令安巴達病亟不受賀九月自丙戌朔獵于黑山赤山
至于月終冬十月乙丑殺酒人索紐十一月辛卯殺近
侍廷壽壬辰殺豕人額伯哩赫嚕珠嚕準訥噶庫庚子

司天臺奏月當食不虧上以為祥歡飲達旦壬寅殺鹿人唐古直格薩喇十二月辛未手殺養人哈里復醫之是冬駐蹕黑河平淀

十八年春正月乙酉朔宴于宮中不受賀己亥觀燈于市以銀百兩市酒命羣臣亦市酒縱飲三夕二月乙卯幸五坊使錫沙哩家宴飲達旦三月甲申如潢河乙酉獲駕鵝祭天地造大酒器刻為鹿文名曰鹿甌貯酒以祭天庚戌殺鵝人呼圖哩近侍華格及監囚喀里仍剉

喀里之尸夏四月癸丑殺蕞人察爾吉已巳詔左右從班有材器幹局者不次擢用老老者增俸以休于家五月丁亥重五以被酒不受賀壬辰獲鵝于碩格水野飲終夜丁酉與政事令蕭巴雅爾南京留守高勲太師珠克劉承訓等酣飲連日已亥殺鹿人佛德埒克陶罕扎卜庫舒古寧察布默克特達勒達六月丙辰殺蕞人托諾已未為殿前都點檢伊勒哈置神帳曲赦京畿囚甲戌特烈於鵬窠中得北大來進是夏清暑裏潭秋七月

辛丑漢主承鈞殂子繼元立來告遣使弔祭九月戊子
殺詳袞巴蘭伊喇罕都等四人己丑登小山祭天地戊
戌知宋欲襲河東諭西南面都統南院大王特烈豫為
之備己亥獵熊以喚鹿人鋪姑并掖庭戶賜伊勒哈甲
辰以伊勒哈兼政事令仍以黑山東穆辰地數十里賜
之以紐歡為近侍女直詳袞嘉們為本部額爾奇木是
秋獵于西京諸山冬十月辛亥朔宋圍太原詔特烈為
兵馬總管發諸道兵救之十一月癸卯冬至被酒不受

賀十二月丁丑殺酒人塔喇噶是冬駐蹕黑山東川
十九年春正月己卯朔宴宮中不受賀己丑立春被酒
命殿前都點檢伊勒哈代行擊土牛禮甲午與羣臣為
葉格戲戊戌醉中驟加左右官乙巳詔太尉華格曰朕
醉中處事有乖無得曲從酒解可覆奏自立春飲至月
終不聽政三月甲寅漢劉繼元嗣立遣使乞封冊辛酉
遣韓知範冊為皇帝癸亥殺前謀穆濟伊喇剌其屍棄
之甲子漢遣使進白鹿己巳如懷州獵獲熊歡飲方醉

馳還行宮是夜近侍霄格盥人革格庖人錫袞等六人反帝遇弒年三十九廟號穆宗後附葬懷陵重熙二十一年諡曰孝安敬正皇帝

贊曰穆宗在位十八年知女巫妖妄見誅諭臣下濫刑切諫非不明也而荒耽于酒畋獵無厭偵鵠失期加炮烙鐵梳之刑獲鴨甚歡除鷹坊剝面之令賞罰無章朝政不視而嗜殺不已變起肘腋宜哉

遼史卷七

遼史卷七考證

應歷十四年五月射鹿于白鷹山六月獵于玉山八月
如磴子嶺呼鹿射之 按遊幸表是年五月獵于玉
山射鹿于白嶺山六月射鹿于格德泉今本紀獵玉
山在六月而格德泉射鹿在五月又以白嶺山為白
鷹山又呼鹿射之表在七月不言磴子嶺而附綴赤
山射鹿之後與本紀均互異考表與本紀往往不符
其是非未可臆斷並兩存之後倣此

應歷十五年三月五坊人四十戶叛入烏爾古四月小黃室韋叛六月德呼勒來降七月烏爾古掠上京按部族表五坊人之叛在二月小黃室韋之叛德呼勒之降及烏爾古掠上京等事較本紀所載均先一月

應歷十九年三月遣韓知範冊漢劉繼元為皇帝按五代史作韓知璠

遼史卷七考證

欽定四庫全書

遼史卷八

元中書右丞相總裁托克托等修

本紀第八

景宗一

景宗孝成康靖皇帝諱賢字賢寧小字明扆世宗皇帝第二子母曰懷節皇后蕭氏察克之亂帝甫四歲穆宗即位養永興宮既長穆宗酗酒怠政帝一日與韓匡嗣

語及時事耶律賢適止之帝悟不復言應歷十九年二月戊辰入見穆宗曰吾兒已成入可付以政己巳穆宗遇弒帝率飛龍使尼哩侍中蕭思溫南院樞密使高勳率甲騎千人馳赴黎明至行在哭之慟羣臣勸進遂即皇帝位於樞前百官上尊號曰天贊皇帝大赦改元保寧以殿前都點檢伊勒哈右皮室詳袞蕭烏埒濟宿衛不嚴斬之三月丙戌入上京以蕭思溫為北院樞密使太平王雅斯哈亡入沙陀己丑伊勒希巴諾木歡以陰

附雅斯哈伏誅癸巳雅斯哈入朝甲午以北院樞密使
蕭思溫兼北府宰相己亥南院樞密使高勲封秦王夏
四月戊申朔進封太平王雅斯哈為齊王改封趙王喜
隱為宋王封隆先為平王舒為吳王道隱為蜀王必舒
為越王迪里為冀王完為衛王五月戊寅立貴妃蕭氏
為皇后丙申朔射柳祈雨有司請以帝生日為天清節
從之壬寅漢遣李匡弼劉繼文李元素來賀冬十月東
幸裏潭十一月甲辰朔行柴冊禮祠木葉山駐蹕鶴谷

乙巳蕭思溫封魏王北院大王烏哲加裕悅

二年春正月丁未如潢河夏四月辛東京致奠于讓國
皇帝及世宗廟五月癸丑西幸乙卯次盤道嶺盜殺北
院樞密使蕭思溫六月還上京秋七月以右皮室詳袞
賢適為北院樞密使九月辛丑得國舅蕭哈濟及哈里
殺蕭思溫狀皆伏誅流其弟紳圖于黃龍府十二月庚
午漢遣使來貢

三年春正月甲寅右伊勒希巴希達遣人獻德呼勒俘

詔賜有功將士庚申置登聞鼓院辛酉南京統軍使韓
匡美封鄴王二月癸酉東幸壬午遣多和使爾斯蘭
回鶻己丑以青牛白馬祭天地三月丁未以飛龍使尼
哩為契丹行宮都部署夏四月丁卯世宗妃卓琳及普
格厭魅賜死己卯祠木葉山行再生禮丙戌至自東幸
戊子蕭紳圖伏誅六月丙子漢遣使問起居自是繼月
而至丁丑回鶻遣使來貢秋七月辛丑以北院樞密使
賢適為西北路招討使八月甲戌如秋山辛卯祭皇兄

吼墓追冊為皇太子諡莊聖九月乙巳賜傳父侍中達里塔太保楚補太保丕勒保母霍寶頁頁等戶口牛羊有差又以潛邸給使者為塔瑪部置官主之壬子辛歸化州甲寅如南京冬十月己巳以黑白羊祀神癸未漢遣使來貢丙戌布古德吐谷渾來貢十一月庚子臚胸河裕悅雅克尼爾率戶四百五十來附乞隸宮籍詔留其戶分隸敦睦積慶永興三宮優賜遣之十二月癸酉以青牛白馬祭天地己丑皇子隆緒生是冬駐蹕金川

四年春二月癸亥漢以皇子生遣使來賀閏月戊申齊王雅斯哈薨三月庚申朔追冊為皇太叔夏四月庚寅朔追封蕭思溫為楚國王是夏駐蹕冰井秋七月如雲州丁丑布古德來貢冬十月丁亥朔如南京十二月甲午詔內外官上封事

五年春正月甲子特哩袞休格伐党項破之以俘獲數來上漢遣使來貢庚午御五鳳樓觀燈二月丁亥近侍薩喇勒誤觸神燄法論死杖釋之壬辰越王必舒獻堂

項俘獲之數戊申以青牛白馬祭天地辛亥幸新城二月乙卯朔復幸新城追封皇后祖瑚穆哩為韓王贈伯瑚嚕古兼政事令寧古齊兼侍中夏四月丙申白氣晝見五月癸亥裕悅烏哲薨輟朝三日辛未女直侵邊都監達里塔伊喇鄂羅羅掠邊民牛馬己卯阿爾斯蘭回鶻來貢六月庚寅女直宰相額爾奇木來朝丙申遣人以宋事來告秋七月庚辰以保大軍節度使耶律錫爾丹為中臺省左相是月駐蹕燕子城九月壬子布

古德部長阿嚕達蘭來貢冬十月丁酉如南京十一月
辛亥朔始獲應歷逆黨近侍霄格華格錫袞等誅之十
二月戊戌漢將改元遣使稟命是月如歸化州

六年春正月癸未幸南京三月宋遣使請和以涿州刺
史耶律昌珠加侍中與宋議和夏四月宋王喜隱坐謀
反廢秋七月丁未朔閤門使卓庫加檢校太尉兼御史
大夫男哈里以告喜隱事遙授隴州防禦使庚申獵于
平地松林冬十月乙亥朔還上京十二月戊子以沙門

昭敏為三京諸道僧尼都總管加兼侍中

七年春正月甲戌朔宋遣使來賀壬寅望祠木葉山二
月癸亥漢鴈門節度使劉繼文來朝貢方物丙寅以青
牛白馬祭天地三月壬午耶律蘇色等獻党項俘分賜
羣臣夏四月遣郎君舒蘇使宋己酉祠木葉山辛亥射
柳祈雨如頻蹕浹清暑五月丙戌祭神姑秋七月黃龍
府衛將雅木丕勒殺都監張琚以叛遣敝史耶律鳴勒畢討
之九月敗雅木丕勒於治河遣其弟安圖追之雅木丕勒走保烏

舍城安圖乃還以餘黨千餘戶城通州是秋至自頻蹕
浞冬十月釣魚土河

八年春正月癸酉宋遣使來聘二月壬寅諭史館學士
書皇后言亦稱朕暨予著為定式三月辛未遣五史廉
問四方鰥寡孤獨及貧乏失職者賑之夏六月以西南
面招討使耶律色珍為北院大王秋七月丙寅朔寧王
扎穆婁安扎伏誅扎穆高勲等除名辛未宋遣使來賀
天清節八月癸卯漢遣使言天清節設無遮會飯僧祝

釐丁未如秋山己酉漢以宋事來告是月女直侵貴德
州東境九月己巳謁懷陵辛未東京統軍使察喇詳袞
古奏女直襲歸州五寨剽掠而去乙亥布古德來貢壬
午漢為宋人所侵遣使求援命南府宰相耶律沙冀王
迪里赴之戊子漢以宋師壓境遣駙馬都尉盧俊來告
冬十月辛丑漢以遼師退宋軍來謝十一月丙子宋主
匡胤殂其弟昞自立遣使來告辛卯遣郎君旺祿塔瑪
訥默庫等使宋弔慰十二月壬寅遣蕭哲庫馬哲賀宋

即位丁未漢以宋軍復至掠其軍儲來告且乞賜糧為
助戊午詔南京復禮部貢院是月哈噶斯國遣使來貢

遼史卷八

遼史卷八考證

景宗小字明辰 按契丹志作明計以音近而譌也
保寧元年斬殿前都點檢耶律伊勒哈 按伊勒哈原
文夷臘葛此又訛夷臘即係一人今併改

保寧六年三月宋遣使請和遣耶律昌珠與宋議和

按職官分紀開寶七年契丹涿州刺史耶律琮以書
遺雄州孫全興願講好於朝廷八年契丹遣克實克
舒蘇來聘自是乃通使矣與紀異又遼書昌珠而宋

書琮其名亦互異

遼史卷八考證

欽定四庫全書

遼史卷九

元中書右丞相總裁托克托等修

本紀第九

景宗二

九年春正月丙寅女直遣使來貢二月庚子宋遣使致
其先帝遺物甲寅以青牛白馬祭天地三月癸亥耶律
沙迪里獻援漢之後所獲宋俘戊辰詔以粟二十萬斛

助漢五月庚午漢遣使來謝且以宋事來告己丑女直
二十一人請宰相額爾奇木之職以次授之六月丙辰
以宋王喜隱為西南面招討使秋七月庚申朔回鶻遣
使來貢甲子宋遣使來聘壬申漢以宋侵來告丙子遣
使助漢戰馬八月漢遣使進葡萄酒冬十月甲子耶律
沙以党項降酋克酬摩約來見賜詔撫諭丁卯以克酬
為司徒摩約為太保各賜物遣之壬申女直遣使來貢
乙酉漢復遣使以宋事來告十一月丁亥朔司天奏日

當食不虧戊戌吐谷渾叛入太原者四百餘戶索而還之癸卯祠木葉山乙巳遣太保塔喇噶等使宋乙卯漢復遣使以宋事來告十二月戊辰獵于近郊以所獲祭天

十年春正月癸丑如長灤二月庚午阿爾斯蘭回鶻來貢三月庚寅祭顯陵夏四月丁卯酉辛巳己巳女直部來貢五月癸卯賜女哩死遣人誅高勲等六月己未駐蹕泃柳湖秋七月庚戌享太祖廟九月癸未平王隆先子

辰格謀害其父車裂以徇是冬駐蹕金川

乾亨元年春正月乙酉遣塔瑪長壽使宋問興師伐劉繼元之故丙申長壽還言河東逆命所當問罪若北朝不援和約如舊不然則戰二月丁卯漢以宋兵壓境遣使乞援詔南府宰相耶律沙為都統冀王迪里為監軍赴之又命南院大王色珍以所部從樞密副使穆濟督之三月辛巳蘇色遣人以別部華格等降納之丙戌漢遣使謝撫諭軍民詔北院大王希達伊實王薩哈勒以

兵戍燕已丑漢復告宋兵入境詔左千牛衛大將軍韓
偁大司馬節度使耶律善補以本路兵南援辛卯女直
遣使來貢丁酉耶律沙等與宋戰於白馬嶺不利翼王
迪里及圖魯卜部節度使都敏黃皮室詳袞唐古皆死
之士卒死傷甚衆夏四月辛亥漢以行軍事宜來奏盧
俊自代州告急辛酉德呼來貢五月己卯宋兵至
河東漢與戰不利劉繼文盧俊來奔六月劉繼元降宋
漢亡甲子封劉繼文為彭城郡王盧俊同政事門下平

章事宋主來侵丁卯北院大王希達統軍使蕭托果伊
實王薩哈勒迎戰于沙河失利己巳宋主圍南京丁丑
詔諭耶律沙及希達托果等軍中事宜秋七月癸未沙
等及宋兵戰于高粱河少却休格色珍橫擊大敗之宋
主僅以身免至涿州竊乘驢車遁去甲申擊宋餘軍所
殺甚衆獲兵仗器甲符印糧饋貨幣不可勝計辛丑耶
律沙遣人上俘獲以權知南京留守事韓德讓權南京
馬步軍都指揮使耶律學古知三司事劉弘皆能安人

心捍城池賜詔褒獎八月壬子準布特哩袞赫魯額爾
奇木阿爾圖來朝乙丑耶律沙等獻俘丙寅以白馬之
役青沙穆濟復以走宋主功釋之希達遇敵而退以劍
背擊之薩哈勒雖却部伍不亂宥之冀王迪里麾下先
遁者斬之杖都監以下壬申宴沙穆濟等將校賜物有
差九月己卯燕王韓匡嗣為都統南府宰相耶律沙為
監軍特哩袞休格南院大王色珍權奚王穆濟各率所
部兵南伐仍命大同軍節度使善補領山西兵分道以

進冬十月乙丑韓匡嗣與宋兵戰於滿城敗績辛未太保舒蘇與宋兵戰於火山敗之乙亥詔數韓匡嗣五罪赦之十一月戊寅宴賞休格及有功將校乙未南院樞密使兼政事令郭襲上書諫畋獵嘉納之辛丑冬至赦改元乾亨十二月乙卯燕王韓匡嗣遙授晉昌軍節度使降封秦王壬戌蜀王道隱南京留守徙王荆是冬駐蹕南京

二年春正月丙子朔封皇子隆緒為梁王隆慶為恒王

丁亥特哩袞休格為北院大王前樞密使賢適封西平
郡王二月戊辰如清河三月丁亥西南面招討副使耶
律旺祿太尉華格遣人獻党項俘閏月庚午有鵠飛止
御帳獲以祭天夏四月庚辰祈雨戊子清暑燕子城五
月雷火乾陵松六月己亥喜隱復謀反囚于祖州秋七
月戊午旺祿等獻党項俘八月戊戌東幸冬十月辛未
朔命巫者祠天地及兵神辛巳將南伐祭旗鼓癸未次
南京丁亥獲敵人射鬼箭庚寅次固安以青牛白馬祭

天地已亥圍瓦橋關十一月庚子朔宋兵夜襲營圖魯
卜部節度使蕭幹及四捷軍詳袞耶律赫德戰却之壬
寅休格敗宋兵於瓦橋東守將張師引兵出戰休格奮
擊敗之戊申宋兵陣於水南休格涉水擊破之追至莫
州殺傷甚衆己酉宋兵復來擊之殆盡丙辰班師乙丑
還次南京十二月庚午朔休格拜裕悅大饗軍士

三年春二月丙子東幸己丑復幸南京三月乙卯皇子
罕巴卒辛酉塋潢土二河之間置永州以秦王韓匡嗣

為西南面招討使五月丙午上京漢軍亂劫立喜隱不
克立其子留禮壽上京留守楚實勒擒之秋七月甲子
誅留禮壽冬十月如富瑚坡十一月辛亥如楚實勒同
政事門下平章事是月以南院樞密使郭襲為武定軍
節度使十二月以遼興軍節度使韓德讓為南院樞密
使

四年春正月己亥如華林天柱三月乙未清明與諸王
大臣較射宴飲夏四月自將南伐至滿城戰不利守太

尉奚幹里中流矢死統軍使善補為伏兵所圍樞密使
色珍救免詔以失備杖之五月班師清暑燕子城秋七
月壬辰遣使賜喜隱死八月如西京九月庚子幸雲州
甲辰獵于尚和山帝不豫壬子次焦山崩於行在年三
十五在位十四年遺詔梁王隆緒嗣位軍國大事聽皇
后命統和元年正月壬戌上尊謚孝成皇帝廟號景宗
重熙二十一年加謚孝成康靖皇帝

贊曰遼興六十餘年神冊會同之間日不暇給天祿應

歷之君不令其終保寧而來人人望治以景宗之資任人不疑信賞必罰若可與有為也而竭國之力以助河東破軍殺將無救滅亡雖一取償於宋得不償失知匡嗣之罪數而不罰善郭襲之諫納而不用沙門昭敏以左道亂德寵以侍中不亦惑乎

遼史卷九

遼史卷九考證

保寧九年七月宋遣使來聘 按續通鑑綱目契丹遣
耶律敞如宋會葬宋遣辛仲甫報之考契丹國志敞
官鴻臚少卿遼史不書會葬之使又續資治通鑑長
編宋史起居舍人辛仲甫如契丹右贊善大夫穆波
副之又契丹志帝欲留仲甫仲甫不可厚禮遣還此
失載宋史姓名

乾亨元年十月韓匡嗣與宋兵戰于滿城敗績 按契

丹志秋九月攻鎮州為宋趙延進所敗考之李燾長
編此即滿城之戰亦作九月俱與此異

景宗在位十四年 按原本訛十三年今改

遼史卷九考證

欽定四庫全書

遼史卷十

元中書右丞相總裁托克托等修

本紀第十

聖宗一

聖宗文武大孝宣皇帝諱隆緒小字文殊努景宗皇帝
長子母曰睿智皇后蕭氏帝幼喜書翰十歲能詩既長
精射法曉音律好繪畫乾亨二年封梁王四年九月壬

子景宗崩癸丑即皇帝位於柩前時年十二皇后奉遺
詔攝政詔諭諸道冬十月己未朔帝始臨朝辛酉羣臣
上尊號曰昭聖皇帝尊皇后為皇太后大赦以南院大
王巴古濟總領山西諸州事北院大王裕悅休格為南
面行軍都統奚王和碩鼐副之同政事門下平章事蕭
道寧領本部軍駐南京乙丑如顯州十一月甲午置乾
州十二月戊午耶律蘇色討準布辛酉南京留守荆王
道隱奏宋遣使獻犀帶請和詔以無書却之甲子達爾

罕納旺舒克醉言宮掖事法當杖釋之辛未南面招
討使秦王韓匡嗣薨癸酉奉大行皇帝梓宮于散塗殿
庚辰省置中臺省官

統和元年春正月戊午朔以大行在殯不受朝乙丑奉
遺詔召先帝庶兄扎穆于散塗殿前復封寧王加宰相
室昉宣徽使布琳等恩丙寅荆王道隱有疾詔遣使存
問是日皇太后幸其邸視疾戊辰以威烏庫哩部節度
使耶律章烏克同政事門下平章事甲戌荆王道隱薨

輟朝三日追封晉王遣使撫慰其家丙子以裕悅休格
為南京留守仍賜南面行營總管印綬總邊事渤海塔
瑪嘉哩以受先帝厚恩乞殉葬詔不許賜物以旌之戊
寅遣使賜裕悅休格及奚王壽寧統軍使佛德等湯藥
命根敦持送休格下車牓以諭燕民辛巳蘇色獻準布
俘壬午涿荊刺史安吉奏宋築城河北詔留守裕悅休
格撓之勿令就功趙妃及公主和克丹奚王壽寧宰相
安寧北大王普努寧特哩袞庫哩吳王舒寧王扎穆橫

帳國舅契丹漢官等並進助山陵費癸未齊國公主率
內外命婦進物如之甲申西南面招討使韓德威奏党
項十五部侵邊以兵擊破之乙酉以蘇色破準布下詔
褒美仍諭與達罕討党項諸部丁亥樞密使兼政事令
室昉以年老請解兼職詔不允二月戊子朔禁所在官
吏軍民不得無故聚衆私語及冒禁夜行違者坐之已
丑南京奏聞宋多聚糧邊境及宋主將如臺山詔休格
嚴為之備甲午葬景宗皇帝於乾陵以近幸朗掌飲伶

人塔魯為殉上與皇太后因為書附上大行丙申皇太后詣陵置奠命繪近臣於御容殿賜山陵工人物有差庚子以先帝遺物賜皇族及近臣辛丑南京統軍使即律善補奏采邊七十餘村來附詔撫存之乙巳以御容殿為玉殿酒谷為聖谷蘇色奏討党項捷遣使慰勞戊申以特哩袞華格為北院大王解領為南府宰相辛亥幸聖山遂謁三陵甲寅以皇女長壽公主下嫁國舅宰相蕭婆項之子吳留三月戊午天德軍節度使推勒父子

戰歿以其弟聶呼襲爵己未次獨山遣使賞西南面有
功將士辛酉以大父帳太尉耶律赫勒訥為特哩袞甲子
駐蹕遼河之平淀辛巳以國舅同平章事蕭道寧為遼
興軍節度使仍賜號忠亮佐理功臣壬午以青牛白馬
祭天地夏四月丙戌朔辛東京以樞密副使耶律穆濟
兼侍中為東京留守庚寅謁太祖廟癸巳詔賜物命婦
寡居者丙申南辛丑謁三陵以東京所進物分賜陵
寢官吏復詔賜西南路招討使達罕劒不用命者得專

殺壬寅致享于凝神殿癸卯謁乾陵乙巳遣人以酒脯
祭平章耶律哈雅墓庚戌幸夫人烏庫哩第謁太祖御
容禮畢幸公主和克丹第飲賜與甚厚壬子大臣以太
后預政宜有尊號請下有司詳定冊禮詔樞密院諭沿
邊節將至行禮日止遣子弟奉表稱賀恐失邊備樞密
請詔北府司徒佛德譯南京所進律文從之遂如徽州
以耶律慶朗為信州節度使五月丙辰朔國舅政事門
下平章事蕭道寧以皇太后慶壽請歸父母家行禮而

齊國公主及命婦羣臣各進物設宴賜國舅帳耆年物
有差壬戌西南路招討請益兵討西突厥諸部詔北王
府耶律普努寧以達巴德呼二部兵赴之癸亥以裕悅
休格在南院過用吏人詔南大王毋相循襲庚午耶律
善補招亡入宋者得千餘戶歸國詔令撫慰辛未次永
州祭王子藥師努墓乙亥詔近臣議皇太后上尊號冊
禮樞密使韓德度以後漢太后臨朝故事草定上之丙
子以青牛白馬祭天地戊寅幸木葉山西南路招討使

達罕奏近遣伊喇伯勒格諭党項諸部來者甚衆下詔褒美六月乙酉朔詔有司冊皇太后日給三品以上法服三品以下用大射柳之服西南路招討使奏党項酋長執額爾奇木子烏延等內附詔撫納之仍察其誠偽謹邊備丙戌還上京己丑有司奏同政事門下平章事駙馬都尉盧俊與公主不協詔離之遂出俊為興國軍節度使辛卯有事于太廟甲午上率羣臣上皇太后尊號曰承天皇帝太后羣臣上皇帝尊號曰天輔皇帝大赦

改元統和丁未覃恩中外文武官各進爵一級以樞密
副使耶律色珍守司徒秋七月甲寅朔皇太后聽政乙
卯上親錄囚王子司徒隆科坐稱疾不赴山陵筓二十
辛酉行再生禮癸酉臨潢尹諾觀進飲饌上與諸王分
朋擊鞠丙子韓德威遣詳袞哈爾瑪上破党項俘獲以
額爾奇木之子來獻辛巳賞西南面有功將士八月戊
子上西巡己丑謁祖陵辛卯皇太后祭楚國王蕭思溫
墓癸巳上與皇太后謁懷陵遂幸懷州甲午上與色珍

於太后前易弓矢鞍馬約以為友己亥獵赤山遣使薦
熊肪鹿脯于乾陵之凝神殿以政事令孫楨無子詔國
舅小翁帳郎君托卜威為後乙巳詔裕悅休格提點元
城壬子韓德威表請伐党項之復叛者詔許之仍發別
部兵數千以助之九月癸丑朔以東京平州旱蝗詔賑
之乙卯謁永興長寧敦睦三宮丙辰南京留守奏秋霖
害稼請權停闕征以通山西糴易從之庚申謁宣簡皇
帝廟辛酉幸祖州謁祖陵壬戌還上京辛未有司請以

帝生日為千齡節從之皇太后言故裕悅烏哲有傳導
功宜錄其子孫遂命其子巴延為林牙丙子如老翁川
冬十月癸未朔司天奏老人星見戊子以公主淑格下
嫁國舅詳袞珠克癸巳蘇色奏德呼部及叛番來降悉
復故地乙未以燕京留守裕悅休格言每歲諸節度使
貢獻如契丹官例止進鞍馬從之丁酉以吳王舒為上
京留守行臨潢尹事上將征高麗親閱東京留守耶律
穆濟所總兵馬丙午命宣徽使兼侍中希琳林牙克特

等將兵東討賜旗鼓及銀符十一月壬子朔觀漁塔瑪
潔癸丑應州奏獲宋諜者言宋除道五臺山將入靈丘
界詔諜者及居停人並磔于市庚辰上與皇太后祭乾
陵下詔諭三京左右相左右平章事副留守判官諸道
節度使判官諸軍事判官錄事參軍等當執公方毋得
阿順諸縣令佐如遇州官及朝使非理徵求毋或畏徇
恒加采聽以為殿最民間有父母在別籍異居者聽鄰
里覺察坐之有孝于父母三世同居者旌其門閭十二

月壬午朔謁凝神殿遣使分祭諸陵賜守殿官屬酒是日幸顯州丁亥以顯州歲貢綾錦分賜左右甲午東幸已亥皇太后觀漁于玉盆灣辛丑觀漁于濬淵甲辰勅諸刑辟已結正決遣而有寃者聽詣臺訴是夕然萬魚燈于雙溪戊申千齡節祭日月禮畢百僚稱賀

二年春正月甲子如長樂二月癸巳國舅帳彰德軍節度使蕭達林來朝甲午賜將軍耶律德布春衣束帶丙申東路行軍宣徽使蕭布琳奏討女直捷遣使執手獎

諭庚子朝皇太后太后因從觀獵于饒樂川乙巳五國
威伊濟節度使耶律威烏克以所轄諸部難治乞賜詔
給劔便宜行事從之丙午上與諸王大臣較射丁未韓
德威以征党項回遂襲河東獻所俘賜詔褒美三月乙
卯華剌部請今後詳表止從本部選授為宜上曰諸部
官惟在得人豈得定以所部為限不允贈故同平章事
趙延照兼侍中夏四月丁亥以宣徽使同平章事蕭布
琳都監蕭勤德獻征女直捷授布琳兼政事令勤德神

武衛大將軍各賜金器諸物庚寅皇太后臨決滯獄辛卯祭風伯壬辰以宣徽南院使劉承規為承德軍節度使崇德宮都部署保義軍節度使張德筠為宣徽北院使五月乙卯祠木葉山丁丑駐蹕浴柳湖六月己卯朔皇太后決獄至月終秋七月癸丑皇太后行再生禮八月辛卯東京留守兼侍中耶律穆濟奉女直珠卜奇薩里等八族乞舉衆內附詔納之九月戊申朔駐蹕土河辛未以景宗忌日詔諸道京鎮遣官行香飯僧冬十月

丁丑朔以歸化州刺史耶律布琳為彰德軍節度使右
武衛大將軍韓倬為彰德軍節度使兼侍衛親軍兵馬
都指揮使十一月壬子以樞密直學士兼給事中鄭穀
為儒州刺史是月蘇色等討準布殺其酋長達爾罕十
二月辛丑以翰林學士承旨馬得臣為宣政殿學士耶
律佛德南京統軍使耶律瑤昇大內特哩袞大仁靖東
京中臺省右平章事

三年春正月丙午朔如長瀝丁巳以翰林學士邢抱朴

為尚書禮部侍郎知制誥左拾遺知制誥劉景吏部郎
中知制誥牛藏用並政事舍人二月丙子朔以牛藏用
知樞密直學士三月乙巳朔樞密奏契丹諸役戶多困
乏請以富戶代之上因閱諸部籍以納喇威二部戶少
而役重并量免之夏四月乙亥朔祠木葉山壬午以鳳
州刺史趙匡符為保靜軍節度使癸未以左監門衛大
將軍王庭勗為奉先軍節度使彰武軍節度使韓德凝
為崇義軍節度使五月壬子還上京癸酉以國舅蕭道

寧同平章事知瀋州軍州事六月甲戌如栢坡皇太后
親決滯獄乙亥以歸義軍節度使王希巖為興國軍節
度使秋七月甲辰朔詔諸道繕甲兵以備東征高麗甲
寅東幸甲子遣郎君巴寧賜秦王韓匡嗣葬物丙寅駐
蹕土河以暴漲命造船橋明日乘步輦出聽政老人星
見丁卯遣使閱東京諸軍兵器及東征道路以平章事
蕭道寧為昭德軍節度使武定軍節度使守司空兼政
事令郭襲為天平軍節度使大同軍節度使守太子太

師兼政事令劉延構為義成軍節度使贈尚父秦王韓
匡嗣尚書令八月癸酉朔以遼澤沮洳罷征高麗命樞
密使耶律色珍為都統駙馬都尉蕭懇德為監軍以兵
討女直丁丑次橐城庚辰至顯州謁凝神殿辛巳幸乾
州觀新宮癸未謁乾陵甲申命南北面臣僚分巡山陵
林木及令乾顯二州上所部里社之數丙戌北皮室詳
袞進勇敢士七人戊子故南院大王錫喇伊囉斡妻蕭
氏奏夫死不能葬詔有司助之庚寅東征都統所奏路

尚陷寧未可進討詔候澤涸深入癸巳皇太后謁顯陵
庚子謁乾陵辛丑西幸閏九月癸酉命邢抱朴勾檢顯
陵丙子行次海上庚辰重九駱駝山登高賜羣臣菊花
酒辛巳詔諭東征將帥乘水涸進討丙申女直宰相哲
伯埒來貢戎戍駐蹕東古山巳亥蘇色奏珠巴克諸部
至近浞額爾奇木伊楞古請俘掠上曰諸部於國無惡
何故俘掠徒生事耳不允冬十一月甲戌詔吳王舒領
秦王韓匡嗣葬祭事丁丑詔以東北路兵馬監軍妻布

達拉存撫邊民戊寅賜公主和克丹葬夫金帛工匠辛
卯以韓德讓兼政事令癸巳禁行在市場布帛不中尺
度者丙申東征女直都統蕭達林菩薩努以行軍所經
地里物產來上

遼史卷十

遼史卷十考證

聖宗即位之十二月戊午 按歷象志朔考是年十二月戊午係朔日

統和元年二月以特哩袞華格為北院大王 按華格傳華格以平宋功遷北院大王事在統和四年

統和元年四月辛公主和克丹第 按和克丹原文胡骨典公主表作和骨典此處又訛胡克典今併改

統和元年六月大赦改元統和 按續通鑑改元統和

復國號大契丹紀不書復國號事

統和二年二月彰德軍節度使蕭達林來朝 按達林
原文撻凜又作闡覽本紀統和七年以前俱作闡覽
十二年以後俱作撻凜實係一人考本傳作撻凜今
畫一改

統和二年四月宣徽使同平章事蕭布琳獻女直捷
按布琳姓蕭氏原文作普領又作蒲寧又作普寧至
此處并訛其姓為耶律遂與北院大王耶律普努寧

原文普奴寧又作蒲奴寧者相混二人史皆無傳均
見于聖宗本紀布琳自統和元年正月初見為宣徽
使至七年四月率兵備宋凡十見其官始終以宣徽
使稱普努寧自統和元年正月至四年十二月本紀
凡八見其官始終以北院大王稱今並分別改正惟
二年十月以歸化州刺史耶律普寧為彰德軍節度
使又別是一人今仍原文

統和二年六月己卯朔 按宋史是年六月庚辰朔

統和二年十一月壬子 按原本壬子上衍冬字上文已於十月標明今刪

統和二年十二月即律瑤昇大內特哩袞 按瑤昇即即律善補之字見本傳

統和三年八月駙馬都尉蕭恒德為監軍 按蕭恒德

統和元年尚越國公主原本訛恒德為懸德今改

統和三年閏九月駐蹕東古山 按遊幸表作東右山

遼史卷十考證

欽定四庫全書

遼史卷十一

元中書右丞相總裁托克托等修

本紀第十一

聖宗二

四年春正月甲戌觀漁土河林牙耶律穆爾古彰德軍
節度使蕭達林上東征俘獲賜詔獎諭丙子樞密使耶
律色珍林牙勤德等上討女直所獲生口十餘萬馬二

十餘萬及諸物已卯朝皇太后決滯訟壬午樞密使色
珍林牙勤德穆爾古節度使達林統軍使碩羅侍中穆
濟奚王府監軍迪里與安吉等克女直還軍遣近侍尼
勒堅詔旌其功仍執手撫諭賜酒果勞之甲午幸長瀝
二月壬寅以四番都統軍李繼忠為檢校司徒上柱國
癸卯西夏李繼遷叛宋來降以為定難軍節度使銀夏
綏宥等州觀察處置等使特進檢校太師都督夏州諸
軍事西番酋帥幹尼奇伊為保大軍節度使鄜坊等州

觀察處置等使甲寅耶律色珍蕭達林穆爾古等族帥
來朝行飲至禮賞有差丙寅行次組斡哩井三月甲
戌裕悅休格奏宋遣曹彬崔彥進米信由雄州道田重
進飛狐道潘美楊繼業鴈門道來侵岐溝涿州固安新
城皆陷詔宣徽使布琳馳赴燕南與休格議軍事分遣
使者徵諸部兵益休格以擊之復遣東京留守耶律穆
濟以大軍繼進賜劔專殺乙亥以親征告陵廟山川丙
子統軍使耶律佛德敗宋軍于固安休格絕其糧餉擒

將吏獲馬牛器械甚衆庚辰寰州刺史趙彥章以城叛
附于宋辛巳宋兵入涿州義順軍節度副使趙希贊以
朔州叛附于宋時上與皇太后駐兵馳羅口詔趣東征
兵馬以為應援壬午詔林牙勤德以兵守平州之海峽
以備宋仍報平州節度使特哩袞若勤德未至遣人趣
行馬乏則括民馬鎧甲闕則取於顯州之甲坊癸未遼
軍與宋田重進戰于飛狐不利冀州防禦使大鵬翼康
州刺史馬贊馬軍指揮使何萬通陷馬丁亥以北院樞

密使耶律色珍為山西兵馬都統以北院宣徽使布琳
為南征都統以副裕悅休格彰國軍節度使艾正觀察
判官宋雄以應州叛附于宋庚寅遣飛龍使雅魯文班
吏雅圖噶閱馬以給先發諸軍詔駙馬都尉蕭繼遠領
之辛卯武定軍馬步軍都指揮使郢州防禦使呂行德
副都指揮使張繼從馬軍都指揮使劉知進等以飛狐
叛附于宋癸巳賜林牙穆爾古旗鼓四劔一率禁軍之
驍銳者南助休格丙申步軍都指揮使穆超以靈丘叛

附于宋詔遣使賜樞密使色珍密旨及彰國軍節度使
雙寬印趣征討夏四月己亥朔次南京北郊庚子特哩
袞瑤昇西南面招討使韓德威以捷報辛丑宋潘美陷
雲州壬寅遣穆濟穆爾古勤德等領偏師以助休格仍
賜旗鼓雙寬印撫諭將校癸卯休格復以捷報上以酒
脯祭天地率羣臣賀于皇太后詔勤德還軍丙午佛德
上所獲鎧仗數戊申監軍宣徽使布琳奏敵軍引退而
奚王壽寧北大王普努寧統軍使佛德等以兵追躡皆

勝之遣敝史勤德持詔褒美及詔侍中穆濟統諸軍赴
行在所本布部節度使和勒敦黃皮室詳袞嘉哩等各
上所獲兵甲又詔兩部突騎赴蔚州以助達林橫帳郎
君老君努率諸郎君巡徼居庸之北將軍華格統平州
兵馬橫帳郎君努克為黃皮室都監郎君伊里為北府
都監各以步兵赴蔚州以助色珍庚戌以色珍為諸路
兵馬都統達林兵馬副部署托色都監以代善補韓德
威癸丑以艾正趙希贊及應州朔州節度副使奚軍小

校阿爾嘉渤海小校果哈等叛入于宋籍其家屬分賜
有功將校宋將曹彬米信北渡拒馬河與裕悅休格對
壘挑戰南北列營長六七里時上次涿州東五十里甲
寅詔裕悅休格奚王籌寧宣徽使布琳南北二王等嚴
備水道無使敵兵得潛至涿州乙卯休格等敗宋軍獻
所獲器甲貨財賜詔褒美蔚州左右都押衙李存璋許
彥欽等殺節度使蕭卓琳執監城使銅州節度使耿紹
忠以城叛附于宋丙辰復涿州告天地戊午上次沙沽

河之北淀召林牙勤德議軍事諸將校各以所俘獲來
上奚王壽寧南北二王率所部將校來朝以近侍納穆
爾所進自落鵠祭天地已未休格布琳來朝詔三司給
軍前夏衣布庚申上朝皇太后辛酉大軍次固安壬戌
圍固安城統軍使佛德先登城遂破大縱俘獲居民先
被俘者命以官物贖之甲子賞攻城將士有差五月庚
午遼師與曹彬米信戰于歧溝關大敗之追至拒馬河
溺死者不可勝紀餘衆奔高陽又為遼師衝擊死者數

萬棄戈甲若丘陵輓漕數萬人匿岐溝空城中圍之壬申以皇太后生辰縱還癸酉班師還次新城休格布琳奏宋兵奔逃者皆殺之甲戌以軍捷遣使分諭諸路京鎮丁丑詔諸將校論功行賞無有不實己卯次固安南以青牛白馬祭天地庚申以所俘宋人射鬼箭詔遣詳袞巴雅爾率弘義官兵南北皮室郎君伊喇四軍赴應朔二州界與特哩袞瑤昇招討韓德威同禦宋兵在山西之未退者辛巳以瑤昇軍赴山西壬午還次南京癸

未休格籌寧普努寧進俘獲色珍遣判官博諾奏復蔚
州斬首二萬餘級乘勝攻下靈丘飛狐賜博諾酒及銀
器丙戌御元和殿大宴從軍將校封休格為宋國王加
布琳籌寧普努寧及諸有功將校爵賞有差丁亥發南
京詔休格備器甲儲粟待秋大舉南征戊子色珍奏宋
軍復圍蔚州擊破之詔以兵授瑤昇韓德威等壬辰以
宋兵至平州瑤昇韓德威不盡追殺降詔詰責仍諭據
城未降者必盡掩殺無使遁逃癸巳以軍前降卒分賜

扈從乙未賞佛德諸將校士卒六月戊戌朔詔韓德威
赴闕加統軍使佛德檢校太師甲辰詔南京留守休格
遣礮手西助色珍乙巳伊勒希巴珠勒呼部送輜重行
宮暑行日五十里人馬疲乏遣使讓之丁未度居庸關
壬子南京留守奏百姓歲輸三司鹽鐵錢折絹不如直
詔增之甲寅色珍奏復懷州乙卯皇太妃諸王公主迎
上嶺表設御幄道傍置景宗御容率從臣進酒陳俘獲
于前遂大宴戊午幸涼陁以所俘分賜皇族及乳母已

未聞所遣宣諭回鶻克呼克國都掄雅里等為珠巴克
邀留詔蘇色賜珠巴克貨幣諭以朝廷來遠之意使者
由是乃得行癸亥以節度使韓布格翰林學士邢抱朴
等充雲州宣諭招撫使丙寅以太尉旺布所俘生口分
賜趙妃及裕悅約尼伊囉韓秋七月丙子樞密使色珍
遣侍御訥呼岱噶楚噶奏復朔州擒宋將楊繼業及上
所獲將校印綬誥勅賜訥呼岱等酒器銀器辛巳以捷
告天地以宋歸命者二百四十人分賜從臣又以殺敵

多詔上京開龍寺建佛事一月飯僧萬人辛卯色珍奏
大軍至蔚州營于州左得諜報敵兵且至乃設伏以待
敵至縱兵逆擊追奔逐北至飛狐口遂乘勝鼓行而西
入寰州殺守城吏卒千餘人宋將楊繼業初以驍勇自
負號楊無敵北據雲朔數州至是引兵南出朔州三十
里至狼牙村惡其名不進左右固請乃行遇色珍伏四
起中流矢墮馬被擒瘡發不食三日死遂函其首以獻
詔詳袞薩木實傳其首裕悅休格以示諸軍仍以朔州

之捷宣諭南京平州將吏自是宋守雲應諸州者聞繼
業死皆棄城遁八月丁酉置錫林塔拉官六員領裕庫
呼女直德里元等諸部人之隸宮籍者以北大王普努
寧為山後五州都管乙巳韓德讓奏宋兵所掠州郡其
逃民禾稼宜募人收獲以其半給收者從之乙卯色珍
還自軍獻俘己未用室昉韓德讓言復山西今年租賦
詔第山西諸將校功過而賞罰之伊實帳宰相安寧功
過相當追告身一通迪錦部節度使佛努答五十特哩

袁瑤昇伊喇呼哩朔州節度使慎思應州節度使庫濟
雲州節度使華格軍校李元迪蔚州節度使佛哩都監
崔其劉繼琛皆以聞敵逃遁奪官伯埒仍配隸本貫領
國舅軍旺祿筭五十壬戌以色珍所部將校前破女直
後有宋捷第功加賞癸亥加色珍守太保九月丙寅朔
皇太妃以上納后進衣物馳馬以助會親頒賜甲戌次
黑河以重九登高于高水南阜祭天賜從臣命婦菊花
酒丁丑次河陽北戊寅內外命婦進會親禮物辛巳納

皇后蕭氏丙戌次儒州以大軍將南征詔遣皮室詳袞
持迪郎君伊喇先赴本軍繕甲兵己丑召北大王普努
寧赴行在所甲午皇太后行再生禮冬十月丙申朔党
項準布遣使來貴丁酉皇太后復行再生禮為帝祭神
祈福己亥以伊實王帳郎君烏里為御史大夫政事令
室昉奏山西四川自宋兵後人民轉徙盜賊充斥乞有
司禁止命新州節度使布克達哩選人分道巡檢北大
王帳郎君哈喇噶扎爾言本府王普努寧十七罪詔橫

帳太保和克台鞠之普努寧伏罪十一笞二十釋之哈喇噶扎爾伏誣告六事命詳酌罪之知事勤德連坐杖一百免官甲辰出居庸關乙巳詔諸京鎮相次軍行諸細務權停理問庚戌分遣伊喇沿邊偵候辛亥命皇族廬帳駐東京延芳淀壬子詔以勅榜付裕悅休格以南征諭拒馬河南六州乙卯幸南京戊午以南院大王留寧言復南院部民今年租賦壬戌以銀鼠青鼠及諸物賜京官僧道耆老甲子上與大臣分朋擊鞠十二月丙

寅朔党項來貢庚午以政事令韓德讓守司徒壬申以古北松亭榆關征稅不法致阻商旅遣使勸之女直請以兵從征許之癸酉御正殿大勞南征將校丙子南伐次狹底塢皇太后親閱輜重兵甲丁丑以休格為先鋒都統戊寅日南至上率從臣祭酒景宗御容辛巳詔以北大王普努寧居奉聖州山西五州公事竝聽與節度使布克達哩共決之癸未祭日月為駙馬都尉勤德祈福乙酉置諸部監勒所部各守營伍毋相錯雜丙戌遣

穆爾古蕭繼遠沿邊巡徼以所獲宋卒射鬼箭丁亥以
青牛白馬祭天地辛卯次白佛塔川獲自落馴狐以為
吉徵祭天地詔駙馬都尉蕭繼遠林牙穆爾古太尉琳
巴等固守封疆毋漏間諜軍中無故不得馳馬及縱諸
軍殘南境桑果壬辰至唐興縣時宋軍屯滹沱橋北選
將亂射之橋不能守進焚其橋癸巳涉沙河休格來議
事北皮室詳袞巴雅爾獻獲宋諜二人上賜衣物令還
招諭泰州卓特部節度使羅卜科都監律盼與宋戰

于泰州不利甲午祭庶鹿神以羅卜科臨陣遁逃奪告
身一通其判官都監各杖之郎君伊喇僧庫埒遇宋先
鋒於望都擒其士卒九人獲甲馬十一賜酒及銀器乙
未以羅卜科等罪詔諭諸軍以御蓋郎君華格權卓特
部節度使橫帳郎君佛哩為都監代羅卜科權領國舅
軍托卜威請置二校領散卒詔以郎君舍音佛德充命
彰德軍節度使蕭達林將軍托色畧地東路詔休格巴
雅爾議軍事十二月己亥休格敗宋軍於望都遣人獻

俘壬寅營于溥沱北詔休格以騎兵絕宋兵毋令入邢
州命太師旺祿謹偵候癸卯小校克酬遇宋輜重引兵
殺獲甚衆并焚其芻粟甲辰詔南大王與休格合勢進
討宰相安寧領迪里部及三剋軍殿上率大軍與宋將
劉廷讓李敬源戰于莫州敗之乙巳擒宋將賀令圖楊
重進等國舅詳袞塔喇噶官使蕭達哩死之丙午詔休
格以下入內殿賜酒勞之丁未築京觀復以南京禁軍
擊楊團城守將以城降詔禁侵掠己酉營神榆村詔上

楊團城粟麥兵甲之數辛亥以黑白二牲祭天地癸丑
拔馮母鎮大縱俘掠丙辰邢州降丁巳拔深州以不即
降誅守將以下縱兵大掠李繼遷引五百騎款塞願婚
大國永作藩輔詔以王子帳節度使耶律襄之女題本
封義成公主下嫁賜馬三千匹

遼史卷十一

遼史卷十一考證

聖宗紀二統和四年四月遣敵史勤德持詔褒美
按敵史刻本舊作敵吏今據永樂大典本改正

十二月乙巳擒宋將賀令圖楊重進等國舅詳袞特爾
格宮使蕭達哩死之按特爾格蕭達哩之死宋通
鑑作士子日事與此異

遼史卷十一 考證

欽定四庫全書

遼史卷十二

元中書右丞相總裁托克托等修

本紀第十二

聖宗三

五年春正月乙丑破東城縣縱兵大掠丁卯次文安遣人諭降不聽遂擊破之盡殺其丁壯俘其老幼戊寅上還南京己卯御元和殿大賚將士壬辰如華林天柱二

月甲午朔至自天柱三月癸亥朔幸長春宮賞花釣魚
以牡丹徧賜近臣歡宴累日丁丑以迪錦部下伊喇嘉
哩偵侯有功命入御蓋郎君班祇候夏四月癸巳朔幸
南京丁酉上率百僚冊上皇太后尊號曰睿德神畧應
運啟化承天皇帝太后禮畢羣臣上皇帝尊號曰至德廣
孝昭聖天輔皇帝戊戌詔有司條上勲舊等第加恩癸
丑清暑冰井六月壬辰召大臣決庶政丙申以耶律蘇
為遼郡刺史秋七月戊辰納喇部節度使薩哈勒有惠

政民請留從之是月獵平地松林九月丙戌幸南京是冬止焉

六年春正月庚申如華林天柱二月丁未奚王籌寧殺無罪人李浩所司議貴請貸其罪令出錢贍浩家從之甲寅大同軍節度使同平章政事劉京致仕己未休格奏宋事宜上親覽之丙寅以司天趙宗德齊泰王守平邵祺閻梅從征四載言天象數有徵賜物有差三月癸未李繼遷遣使來貢夏四月乙未幸南京丁酉呼勒希

橫突韓德讓隨馬皇太后怒殺之戊戌韋宋國王休格
第五月癸亥南府宰相耶律沙薨閏月丙戌朔奉聖州
言太祖所建金鈴閣壞乞加修繕詔以南征恐重勞百
姓待軍還治之壬寅阿爾斯蘭回鶻來貢甲寅威伊濟
部以歲貢貂鼠青鼠皮非土產皆於他處貿易以獻乞
改貢詔自今止進牛馬六月癸亥党項太保鄂勒歡來
朝貢方物乙丑諭諸道兵馬備南征攻城器具癸酉額
爾奇木鄂勒博送沙州節度使曹恭順還授裕悅秋七

月丙戌觀市己亥遣南面招討使韓德威討河湟番違
命者賜休格巴雅爾部諸軍戰馬己酉駐蹕洛河壬子
加韓德威開府儀同三司兼政事令門下平章事東京
留守兼侍中漆水郡王耶律穆濟為大同軍節度使癸
丑巴雅爾請置涿州驛傳八月丙辰以青牛白馬祭天
地戊午休格巴雅爾紐勒琿捉生將至易州遇宋兵殺
其指揮使而還庚申幸黎園溫湯癸亥以將伐宋遣使
祭木葉山丁丑瀕海女直遣使薩喇勒來朝西北路管

押詳袞舒僧格以伐哲琳珠嚕二部上所俘獲東路林
牙蕭勤德及統軍實埒以擊敗女直兵獻俘大同軍節
度使耶律穆濟奏今歲霜早乏食乞增價折粟以利貧
民詔從之濱海女直遣薩喇勒來修土貢丙申華格與
珠巴克崇古嚕來貢休格遣詳袞音德爾獻所獲宋諜
者丁酉皇太后幸韓德讓帳厚加賞賚命從臣分朋雙
陸以盡歡九月戊戌幸南京己亥有事于太宗皇帝廟
以唐元德為奉陵軍節度使癸卯祭旗鼓南伐庚戌次

涿州射帛書諭城中降不聽乙卯縱兵四面攻之城破
乃降因撫諭其衆駙馬蕭勤德太師達林皆中流矢勤
德載帝車中以歸聞宋軍退遣色珍巴雅爾追擊大敗
之冬十月戊午攻沙堆驛破之己巳以黑白羊祭天地
庚午以宋降軍分置七指揮號歸聖軍壬申行軍參謀
宣政殿學士馬得臣言諭降宋軍恐終不為用請竝放
還詔不允丙子籌寧奏破狼山捷辛巳復奏敗宋兵于
益津閼癸未進軍長城口宋定州守將李興以兵來拒

休格擊敗之追奔五六里十一月甲申上以將攻長城
口詔諸軍備攻具庚寅駐長城口督大軍四面進攻士
潰圍委城遁色珍招之不降上與韓德讓邀擊之殺獲
殆盡獲者分隸燕軍辛卯攻滿城圍之甲午拔其城軍
士開北門遁上使諭其將領乃率衆降戊戌攻下祁州
縱兵大掠己亥拔新樂庚子破小狼山砦丁未宋軍千
人出益津關國舅郎君托卜威詳袞實格擊走之殺一
副將己酉休格獻黃皮室詳袞徇地莫州所獲馬二十

匹士卒二十人命賜降者衣帶使隸燕京辛亥西路又
送降卒二百餘人給寒者裘衣以馬得臣權宣徽院事
十二月甲寅朔賜皮室詳袞持迪圖古勒戰馬橫帳郎
君達達哩刼掠命杖之丙辰畋于沙河休格獻奚詳袞
葉嚕所獲宋諜丁巳遣北宰相蕭繼遠等往覘安平侍
衛馬軍司奏攻祁州新樂都頭劉贊等三十人有功乞
加恩賞是月大軍駐宋境是歲詔開貢舉一人及第

七年春正月癸未朔班師戊子宋雞壁砦守將郭榮率

衆來降詔屯南京庚寅次長城口三卒出營劫掠笞以
徇衆以所獲物分賜左右壬辰李繼遷與兄繼捧有怨
乞與通好上知其非誠不許癸巳諭諸軍趣易州己亥
禁部從伐民桑梓癸卯攻易州宋兵出遂城來援遣鐵
林軍擊之擒其指揮使五人甲辰大軍齊進破易州降
刺史劉墀守陴士卒南遁上帥師邀之無敢出者即以
馬質為刺史趙質為兵馬都監遷易州軍民于燕京以
東京騎將夏貞顯之子仙壽先登授高州刺史乙巳幸

易州御五花樓撫諭士庶丙午以青牛白馬祭天地詔
諭三京諸道戊申次漆水謁景宗皇帝廟詔遣涿州刺
史耶律守雄護送易州降人八百還隸本貫己酉次岐
溝射鬼箭辛亥還次南京六軍解嚴二月壬子朔上御
元和殿受百官賀詔雞壁砦民二百戶徙居檀順薊三
州甲寅回鶻于闐師子等國來貢乙卯大饗軍士爵賞
有差樞密使韓德讓封楚國王駙馬都尉蕭寧遠同政
事門下平章事是日幸長春宮甲子詔南征所俘有親

屬分隸諸帳者給官錢贖之使相從乙丑賞南征女直
軍使東還丙寅禁舉人匿名飛書謗訕朝廷癸酉吐蕃
党項來貢甲戌雲州租賦請止輸本道從之丙子以女
直和克岱為本部相分遣巫覡祭名山大川丁丑皇子
佛寶努生戊寅阿爾斯蘭于闐轄哩遣使來貢三月壬
午朔遣使祭木葉山禁芻牧傷禾稼宋進士十七人挈
家來歸命有司考其中第者補國學官餘授縣主簿尉
李繼遷遣使來貢丁亥詔知易州趙質收戰亡士卒骸

骨築京觀戊子賜裕悅宋國王紅珠筋線命入內神帳
行再生禮皇太后賜物甚厚以雞壁砦民成廷朗等八
戶隸飛狐己丑詔免雲州逋賦伊實王固寧擊鞠為所
部郎君高四縱馬突死詔訊高四罪丙申詔開奇峰路
通易州市戊戌以王子帳耶律襄女封義成公主下嫁
李繼遷是春駐蹕延芳淀夏四月甲寅還京乙卯國舅
太師蕭達林為子巴雅爾請尚皇女延壽公主許之丙
辰謁太宗皇帝廟御史大夫烏爾古領伊實大王己未

幸延壽寺飯僧甲子諫議大夫馬得臣以上好擊毬上
疏切諫云臣伏見陛下聽朝之暇以擊毬為樂臣思此
事有三不宜上下分朋君臣爭勝君得臣奪君輸臣喜
一不宜也往來交錯前後遮約爭心競起禮容全廢若
貪月杖誤拂天衣臣既失儀君又難責二不宜也輕萬
乘之貴逐廣場之娛地雖平至為堅确馬雖良亦有驚
蹶或因奔擊失其控御聖體寧無虧損太后豈不驚懼
三不宜也臣望陛下念繼承之重止危險之戲疏奏大

嘉納之丁卯托歡和珍回鶻安進吐蕃都圖等自宋來
歸皆賜衣帶皇太后謁于奇善汗廟丙子以錫里軍耶
律杳為詳袞已卯駐蹕儒州龍泉庚辰遣宣徽使布琳
等率兵分道備宋以約尼副使崆郭囉為錫里伊喇詳
袞五月辛巳祭風伯于儒州白馬村休格引軍至滿城
招降卒七百餘人遣使來獻詔隸東京辛卯獵桑乾河
壬辰燕京奏宋兵至邊時暑未敢與戰且駐易州俟彼
動則進擊退則班師從之六月庚戌朔以太師札穆迎

合過之二十年酉詔燕樂密雲二縣荒地許民耕種免
賦役十年甲戌宣政殿學士馬得臣卒詔贈太子少保
賜錢十萬粟百石乙亥出諸畜賜邊部貧民是月休格
巴雅爾破宋兵于秦州秋七月乙酉御含涼殿視朝丙
戌以中丞耶律哈密喀權伊勒希巴橫帳郎君耶律延
壽為御史大夫癸巳遣兵南征甲午以德勒賓納喇威
三部各四人益東北路來人布爾德仍給印綬丁酉勞
南征將士是日帝與皇太后謁景宗皇帝廟八月庚午

放進士高進等二人及第冬十月禁置網捕兔十一月
甲申于闐張文寶進內丹書十二月甲寅釣魚于沈子
樂癸亥獵于好草嶺



遼史卷十二

遼史卷十二考證

聖宗紀三統和五年八月丙辰以青牛白馬祭天地

按朔考是年八月係乙卯朔丙辰乃八月初二日也
本紀原文誤八七月謹據朔考改

六年是歲詔開貢舉一人及第 按永樂大典本書放
高舉一人及第攷本紀是年以後俱書放某等幾人
及第則此處當係脫文謹附考

七年十二月甲寅釣魚于沈子灤 按十二月原本作

沈子臺

遼史卷十二考證